

# Dal scutinader da chavals al scutinader da taurs

Daco ch'il contact cun la muaglia vegn adina pli difficil

DA HEINI HOFMANN

■ Las novas furmas da tratga d'animals da niz han era purtà midadas en il tractament dals animals. Cun la midada dals vegls uigls da rentar a l'uigl liber è era i en emblidanza il maletg da la puscha prusa. Ir enturn cun animals che sa movan libramain è pli cumpltìg; surtut il contact cun vatgas-mamma mez selvadias pretenda ina nova tenuta. Il maletg nostalgic e simpatic dal pur che stat en stretg contact cun ses muvel, cloma mintga vatga cun il num, mulscha ella a maun, charsina mintgatant ses chau, la streglia la dumengia en damaun sin la pastgira e l'accumpogna la finala cun plets quietants tar il mazler, quai è in maletg dal passà.

## Domesticaziun reciproca?

Oz sa limitescha il contact quotidian cun ils animals da latg sin las paucas manipulaziuns en la mulschera, sin il pavlar, laschar il muvel sin la pastgira u en la clasira. Anc pli extrema è la situaziun en la tratga da vatgas-mamma, nua ch'ìls animals passentan savens l'entira stad sin la pastgira u schizunt sin l'alp – senza grondas intervenziuns umanas. Igl è bain cler che talas vatgas libras che defendan lur vadels n'èn betg pli puschas prusas.

La tratga da muvel natirala ha bain purtà dapli libertad e moviment per ils animals, ma il contact e la tgira individuala han patì. E cunquai che la prusadad vegn spert dominada da la selvadiad, sch'ìns lascha a quella libra via, han ins ussa tar ils animals da niz ina situaziun schizofrena: Cun la domesticaziun elavurada cun gronda stenta durant millennis avev'ìns cuntanschì ina relaziun da confidenza tranter animal e carstgaun. Questa confidenza vegn ussa puspè minimada entras l'allevament al liber, e quai porta novs problems.

Facit: Intervenziuns indispensablas en la vita dals animals, per exempel in tractament veterinar, la fructificaziun artificiaza, la chargia ed il transport u era la meztga daventan pli e pli privlusas e chaschunan accidents, perquai ch'animals mez selvadis reageschan tenor lur instinct en situaziuns precaras. Era viandants e sportists da temp liber sa sentan pli e pli malsegirs, cunzunt sin pastgiras d'alp. Lur cuminanzas d'interess han gia dà l'incumbensa d'elavurar in feigl d'infurmaziun davart il cumportament en talas situaziuns.

## Il linguatg dal corp

Tge pon ins pia far, sch'ìns vegn tuttena confruntà cun il fatg ch'arments pli baud pulits ed obedaivels èn tuttena animals cun cornas chaprizius ed aggressivs? Fitg simpel, ins sto adattar il cumportament visavi ils animals a la nova situaziun. I fiss numnadamain paradox da conceder a la muaglia dapli libertad (e cun quai er dapli selvadiad) en il senn da la protezzion dals animals e da l'autra vart puspè tractar ils animals cun dapli direzza per motivs da la protezzion da l'uman.

Perquai vegn uss puspè applitgà in vegl med bain cumprovà per schliar conflicts: Discurre in cun l'auter, quai ch'ìns na po betg mo far sur il linguatg da tuns – ils animals han per quels in fitg bun sensori – mabain era e cun anc dapli success sur il linguatg dal corp. Ils elevaturs da chavals han daditg experimentà e perfecziunà questa metoda dal scutinader da chavals, e pertge na duess quai betg era funcziunar tar la muaglia. Uschia è naschida la nova spezia da scutinaders da taurs.

## L'entschatta

Sco dapertut en la vita dovri per mintga innovaziun in pionier, en quest cas è quai stà il maister pur (e bostger diplomà) Armon Fliri, pli baud durant la stagiun da stad manader da gestiun da l'alp d'experiment da la SPF Weissenstein a Preda/GR e durant la stagiun d'enviern collavuratur sin il bain d'experiment Chamau a Hüh-



Ina domesticaziun miaivla cun il chavester pon ins cuntanscher mo cun in trenament quotidian e cun blera pazienza.

PDS

nenberg/ZG. Oz maina Armon Fliri il bain Sonnenberg ad Unterengstringen, nua ch'el tgira tranter auter in muvel da vatgas-mamma Angus. In bel di ha el gi l'idea geniale da transponer il linguatg da chavals da Monty Roberts en linguatg d'arments.

Il medem mument aveva il magister d'agricultura e vicedirectur dal Plantahof a Landquart, Carl Brandenburger, il problem dischagreabel da domesticar mintg'onn ensem cun sia gliued radund in tozzel taurs en il manaschi da tratga da taurs da charn da la scola, quai che na succedeva betg adina senza aggressiuns dad omaduas varts e pudeva mintgatant era daventar detg malsegir. Tge era damai pli evident che d'enviar il pionier da scutinaders da chavals e da concepir ensem cun el in seminari pratic per allevaturs. Il success e l'interess (en Svizra ed a l'exterior) èn stads uschè gronds ch'ina tala puschida da curs vegn ussa multiplitgada ed instituzionalisada.

## L'ierta da Monty Roberts

Propi l'entschatta ha dentant in auter fatg, Monty Roberts, enconuscent sco quel che discorra cun ils chavals, il scutinader da chavals per se. Era el ha fatg tras in process. Sco giuven mat ha el l'emprim emprendì da ses bab co ch'ìns «rumpa» cun forza la voluntad da chavals selvadis. In di, cura ch'el stueva tschiffar in la steppa da Nevada tschuncanta mustangs (chavals selvadis), ha el observà co ch'ina chavalla disciplinava in stallun giuven cun al separar temporarmain dal muvel – quai che fiss en ina zona da chatscha libra in trument a mort.

Il giuven Monty Roberts aveva observà il linguatg dal corp che vegniva applitgà – surtut la midada da la rolla d'attiv-agressiv a passiv-intim. Questa metoda ha el applitgà pli tard en sia lavur: Pertge na dueva quai che funcziunava tranter ils animals betg era funcziunar tranter uman ed animal? Sia conclusiun generala: «Nagin da nus umans n'ha il dretg da dir ad in conuman u ad in animal: U che ti fas quai che jau di, u che jau fatsch mal a tai.»

## Differenza tranter chaval/armement

Cun quai era naschì il princip da la domesticaziun da chavals nunviolenta e damai era la noziun dal scutinader da chavals. (Be a l'ur anc la remartga che talas dressuras da chavals miaivlas eran gia daditg usitadas en circuls circensics ed avessan pudì vegnir surpigliadas.) Impresiu-nads da quests success eran ils allevaturs d'arments da l'idea che questa metoda fiss

forsa era adattada per schliar ils problems cun lur animals tegnids en il liber e qua tras pli selvadis e rebels. Perquai èn ins i a la tschertga d'in scutinader da taurs.

La metoda elavurada per ils chavals ha natiralmain stùì vegnir adattada als arments ch'èn da tut altra natira ch'ìls chavals, era sche omadus èn erbivors ed animals da triep. Ma il chaval è in animal tipic da fugia e ses instrumentari principal èn las chommas. Era ses sistem da digestiun – cun in pitschen magun e gronda beglia – è endrizzà per prender svelta la fugia. Da l'autra vart è l'arment disponì cun sias cornas (premess ch'el ha insumma anc quellas sco animal da niz) per sa defender ed attatgar. Era ses sistem da digestiun cun ils buttatschs voluminus n'è betg concepi per ina strategia da fugia. Perquai reageschan l'arment ed il chaval differentamain sin in privel.

## Finamira: manischabel cun il chavester

Ina domesticaziun miaivla cun il chavester pon ins però cuntanscher mo cun in trenament quotidian e cun blera pazienza. Ed ella sto sa basar sin il princip da «l'avanzament e la retratga», vul dir adina dus pass enavant ed in enavos, enfin che l'animal tolerescha il giavischè. Per far quai dovri ina infrastruttura, in giatter radund massiv (p. ex. in corral d'elements) cun in radius da circa 5 m e – per evitar sigls sur il giatter – 1,6 m aut. Questa cursa radunda permetta plinavant ina successiun armonica dals moviments; quai è era il motiv che las maneschas da circus e la chabgia centrala èn da furma radunda.

## In zichel «senn per la vatga»

Il meglier adattà sco chavester è in chavester Angus fatg da sughet gross (main privel da sgriffels tar uman ed animal). Quel pon ins plinavant adattar senza fadia a mintga grondezza dal chau. Il sughet è d'ina lunghezza che permetta da lonschar l'animal en il rintg. Ed alura dovri er anc in bastun sco bratsch prolungà per diriger e tutgar il corp da l'animal bufatgmain ord distanza segira. (Anc ina gia la remartga a l'ur: Tut quests meds d'agid e quests trics applitgavan ils magisters d'animals en maneschas da circus ed ils dompturs d'animals selvadis en las chabgias centralas gia daditg avant tut ils scutinaders da chavals e da taurs.)

Il success da la domesticaziun miaivla cun il chavester dependa da l'animal e da l'uman. Era tranter ils arments datti animals pli u main manischabels, e betg mintga allevatur che s'exercitescha sco

vester (trair suren) e cun il bastun ed il maun, enfin ch'ìns arriva da metter si il chavester. Ussa cumenza il lonschar vi dal sughet cun diriger sur il linguatg dal corp. In'ulteriura manipulaziun è da rentar il chavester cun maun ruassaivel ed alura schliar e lonschar cun scursanir adina dapli il sughet, enfin che l'animal po vegnir manà per il chavester. Ina giada che quai è reussì han ins cuntanschì la finamira ed ha cumprovà ch'ìls scutinaders da taurs èn scolars diligents dals scutinaders da chavals. E quai ch'è il pli legraval: Tant l'uman sco l'animal profiteschian!

## Tips per viandants

Pli baud avevan ils viandants ed ils sportists da temp liber strusch problems cun la muaglia. En il fratemp san ins era che la color cotschna na provochescha naginas aggressiuns. En la retina dals arments manca numnadamain – auter che tar l'uman, ma sco tar las bleras spezias da mammals – il receptur per la color cotschna.

Pervi da la tratga da muvel moderna vegnan viandants e sportists dentant confruntads oz adina dapli cun situaziuns malempernaivlas. Co duai ins alura sa cumportar endretg?

Sch'il muvel è en clasira, fan ins in detur sin las sendas existentas. Nua ch'ìls animals sa movan libramain sin las pastgiras alpestras, duai ins sa far remartgar cun la vusch e cun il corp ed evitar da vegnir memia datiers. Surtut dals vadels duess ins star sin distanza per betg svegliar l'instinct da defensiun da las vatgas-mamma.

Vegn ins tuttina en ina situaziun precara, pon ins sa defender cun il fist da viandar ch'ìns duess avair cun sai per tals cas; per il solit tanschi gia da gesticular cun il fist.

Ils chauns, surtut sch'els n'han betg in bun appel, duess ins tegnaire vi da la tschinta per betg svegliar agitaziuns evitablas. Datti tuttina in'avischinaziun critica, duess ins immediat laschar il chaun da la corda per betg sa metter en dubel privel.

Insumma: Respect e saun giudizi enstagl da curaschi nunprudent e panica – e mai emblidar che l'uman è «l'invasur» sin la pastgira.